

KHUTBAH KHAS AIDILADHA 1446H/2025M

**“MERAH KEIMANAN, MENINGKATKAN PENGORBANAN”
(7 Jun 2025M/ 10 Zulhijjah 1446H)**

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ،

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

الْحَمْدُ لِلَّهِ الَّذِي جَعَلَ الْأَعْيَادَ مَصْدَرًا لِلْهَنَاءِ وَالسُّرُورِ، وَتَفَضَّلَ فِي هَذِهِ
الْأَيَّامِ الْعَشْرِ عَلَى كُلِّ عَبْدٍ شَكُورٍ، سُبْحَانَهُ غَافِرِ الذَّنْبِ وَقَابِلِ التَّوْبِ،
وَهُوَ الْعَزِيزُ الْغَفُورُ.

أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ، وَأَشْهَدُ أَنَّ سَيِّدَنَا مُحَمَّدًا
عَبْدَهُ وَرَسُولَهُ. اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ وَسَلِّمْ
تَسْلِيمًا كَثِيرًا.

أَمَّا بَعْدُ، فَيَا عِبَادَ اللَّهِ، اتَّقُوا اللَّهَ حَقَّ تَقَاتِهِ وَلَا تَمُوتُنَّ إِلَّا وَأَنْتُمْ
مُسْلِمُونَ.

Muslimin dan muslimat yang dirahmati Allah,

Marilah kita bersama-sama meningkatkan ketakwaan kepada Allah
subhanahu wata'ala dengan bersungguh-sungguh melaksanakan
perintah-Nya dan meninggalkan segala larangan-Nya. Mudah-
mudahan kita dikurniakan kejayaan yang hakiki di dunia dan di

akhirat. Mimbar pada hari ini akan membicarakan khutbah bertajuk **“Meraih Keimanan, Meningkatkan Pengorbanan”**.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

Muslimin dan muslimat yang dirahmati Allah,

Aidiladha merupakan anugerah daripada Allah *subhanahu wata'ala* kepada hamba-hamba-Nya yang di jiwanya sentiasa menghayati nilai keimanan dan pengorbanan dalam kehidupan mereka. Setiap kali tibanya Aidiladha, kita akan diingatkan tentang kisah Nabi Ibrahim *alaihissalam*, isterinya Saidatina Hajar serta anaknya, Nabi Ismail *alaihissalam*. Sangat jelas terpancar daripada kehidupan mereka sifat sabar iaitu keteguhan mereka dalam mempertahankan keyakinan bahawa Allah *subhanahu wata'ala* akan membantu dan menjaga mereka ketika itu.

Nabi Ibrahim *alaihissalam* berpegang kuat dengan akidah ketauhidan kepada Allah *subhanahu wata'ala* sejak muda lagi. Sejarah menceritakan kisah baginda yang menghancurkan berhala sembahan Namrud dan kaumnya yang menyebabkan baginda dihukum dengan cara dibakar tetapi diselamatkan oleh Allah *subhanahu wata'ala*.

Setelah tua, Nabi Ibrahim *alaihissalam* dikurniakan seorang anak bernama Ismail *alaihissalam* melalui isteri keduanya iaitu Saidatina Hajar. Kegembiraannya itu tidak lama kerana diuji oleh Allah *subhanahu wata'ala* dengan memerintahkannya supaya menghantar dan menempatkan Saidatina Hajar dan Ismail *alaihissalam* di lembah

yang tandus lagi gersang. Demi mentaati perintah Allah *subhanahu wata'ala*, Nabi Ibrahim *alaihissalam* dengan kerelaan dan pada waktu yang sama dengan nada keprihatinan, memanjatkan doa seperti yang dirakamkan di dalam Surah Ibrahim, ayat 37:

رَبَّنَا إِنِّي أَسْكَنْتُ مِنْ ذُرِّيَّتِي بِوَادٍ غَيْرِ ذِي زَرْعٍ عِنْدَ بَيْتِكَ الْمُحَرَّمِ رَبَّنَا لِيُقِيمُوا الصَّلَاةَ فَاجْعَلْ أَفْئِدَةً مِنَ النَّاسِ تَهْوِي إِلَيْهِمْ وَارْزُقْهُمْ مِنَ الثَّمَرَاتِ لَعَلَّهُمْ يَشْكُرُونَ (٣٧)

Maksudnya: *"Wahai Tuhan kami! Sesungguhnya aku telah menempatkan sebahagian daripada zuriat keturunanku di sebuah lembah (Tanah Suci Makkah) yang tiada tanaman padanya, di sisi rumah-Mu yang diharamkan mencerobohnya. Wahai Tuhan kami, (mereka ditempatkan di situ) supaya mereka mendirikan sembahyang (dan memakmurkannya dengan ibadat). Oleh itu, jadikanlah hati sebahagian daripada manusia tertarik gemar kepada mereka, (supaya datang beramai-ramai ke situ), dan kurniakanlah rezeki kepada mereka dari berbagai jenis buah-buahan dan hasil tanaman, semoga mereka bersyukur.*

Fikirkanlah, adakah kita berkesanggupan dan memiliki daya tahan keimanan untuk meninggalkan keluarga yang disayangi dalam keadaan demikian? Bayangkan pula keadaan isteri, Saidatina Hajar, tatkala ditinggalkan seseorang diri bertanggungjawab ke atas anak yang masih lagi kecil tanpa mempunyai bekalan.

Pengorbanan Saidatina Hajar juga amat besar, ditinggal suami tanpa manusia lain kecuali Nabi Ismail *alaihissalam* yang masih kecil.

Saidatina Hajar reda sepenuh jiwa dan raganya berkorban demi mentaati perintah Allah *subhanahu wata'ala*. Pada suatu hari Saidatina Hajar kehabisan bekalan air hingga tidak dapat menyusukan anaknya Ismail. Oleh kerana risau keselamatan anaknya, dia sanggup bersusah-payah berlari-lari berusaha mencari air antara bukit Safa dan Marwah sebanyak 7 kali. Kemudian Allah *subhanahu wata'ala* mengurniakan pertolongan dengan menerbitkan mata air berdekatan Kaabah yang dikenali sebagai telaga Zam Zam.

Subhanallah! Berkat daya tahan keimanan, maka Allah *subhanahu wata'ala* telah memelihara mereka. Doa yang mereka pohonkan kepada Allah *subhanahu wata'ala* telah dimakbulkan apabila sebuah kawasan tandus yang bernama Makkah telah menjadi sebuah kota yang dicintai oleh jutaan manusia dan menjadi sebuah kota yang penuh keberkatan disisi-Nya sehinggalah ke hari ini, seperti yang dimohon oleh Nabi Ibrahim *alaihissalam* dalam doanya.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

Muslimin dan muslimat yang dirahmati Allah,

Kisah keluarga Nabi Ibrahim *alaihissalam* ini mengingatkan kita akan kesan daya kekentalan dan kekuatan iman. Keadaan ini mampu menggerakkan manusia untuk mencapai perkara yang luar kotak fikiran biasa. Sama ada dalam mengharungi kesulitan dalam pengorbanan dan mengatasi segala cabaran kehidupan, mahupun mencapai kejayaan demi kejayaan, keimanan dan pengorbanan adalah pemangkin serta pencetus kepadanya.

Daya tahan keimanan ini bukanlah dicerminkan melalui bentuk amalan tertentu, ataupun dengan berpeluk tubuh dan bergantung harapan atau berdoa sahaja. Sebenarnya, ia melahirkan sifat pengorbanan dan disiplin dalam diri yang mendorong kita sentiasa mencari huraian serta mengukir kejayaan di dunia ini lagi dan di akhirat kelak.

Sehubungan itu juga, dalam membicarakan keimanan dan pengorbanan ini apabila perhatian kita dibawa kepada tragedi yang menimpa saudara kita di Palestin pada masa kini, maka kita dengan segera dapat melihat secara jelas gambaran keteguhan iman yang meresap dalam diri mereka. Segala penindasan, pembunuhan dan kezaliman yang mereka alami, dan segala kesusahan serta penderitaan yang ditanggung, dihadapi oleh mereka dengan penuh kesabaran dan ketabahan, demi nilai sebuah pengorbanan untuk mempertahankan kedaulatan tanahair mereka. Inilah manifestasi pengorbanan yang dicetuskan oleh kekuatan iman apabila telah meresap kukuh dalam jiwa. Daripada Abu Umamah *radiallahu anhu*, sabda Rasulullah *sallallahu alaihi wasallam*:

((لَا تَزَالُ طَائِفَةٌ مِنْ أُمَّتِي عَلَى الْحَقِّ ظَاهِرِينَ، لَعَدُوَّهُمْ قَاهِرِينَ، لَا يَضُرُّهُمْ مَنْ خَالَفَهُمْ إِلَّا مَا أَصَابَهُمْ مِنْ لَأُوءَاءَ حَتَّى يَأْتِيَهُمْ أَمْرُ اللَّهِ وَهُمْ كَذَلِكَ)) قَالُوا: يَا رَسُولَ اللَّهِ، وَأَيْنَ هُمْ؟ قَالَ: ((بَيْتِ الْمَقْدِسِ وَأَكْنَافِ بَيْتِ الْمَقْدِسِ))

Maksudnya: *Satu golongan daripada ummatku akan tetap berpegang teguh pada iman mereka, mengalahkan musuh mereka. Orang yang menentang mereka tidak akan dapat memberi mudarat kepada mereka, kecuali dengan kesusahan (kadang-kadang) hingga datang perintah Allah ketika mereka dalam keadaan itu." Para sahabat bertanya, "Wahai Rasulullah, di manakah mereka?" Baginda menjawab, "Di Baitul Maqdis dan kawasan sekitarnya.*

(Hadis riwayat Imam Ahmad)

Ujian yang menimpa diri kita boleh melahirkan kebaikan dan peluang apabila kita memhami bahawa setiap ujian ini adalah daripada Allah *subhanahu wata'ala*. Ingatlah bahawa Allah *subhanahu wata'ala* tidak akan menguji kita kecuali Allah *subhanahu wata'ala* maha mengetahui kita mempunyai potensi bagi mengatasinya. Firman Allah *subhanahu wata'ala* dalam surah al-Baqarah, ayat 286:

لَا يُكَلِّفُ اللَّهُ نَفْسًا إِلَّا وُسْعَهَا ۚ لَهَا مَا كَسَبَتْ وَعَلَيْهَا مَا اكْتَسَبَتْ ۗ ...

Maksudnya: *Allah tidak memberati seseorang melainkan apa yang terdaya olehnya. Ia mendapat pahala kebaikan yang diusahakannya, dan ia juga menanggung dosa kejahatan yang diusahakannya ...*

Ummah yang beriman adalah mereka sering bermuhasabah dan berfikir dan tidak hanya menerima sesuatu tanpa penilaian. Daya tahan keimanan juga bermakna kita menyibukkan diri dengan perkara yang bermanfaat, yang membawa kebaikan dan kesejahteraan, dan menjaga kebajikan diri dan masyarakat.

Dengan kemajuan teknologi serta ledakan *Kecerdasan Buatan (AI)* yang merubah landskap dunia pada masa ini, kita menjadi lebih terdedah kepada pelbagai pengaruh sama ada baik ataupun sebaliknya. Hampir setiap daripada kita memiliki akses untuk menyampaikan dan menerima jutaan maklumat melalui pelbagai peralatan teknologi yang begitu hebat kuasanya dan begitu mudah digunakan. Tetapi jika akses dan peralatan teknologi ini tidak digunakan dengan bijak dan betul, ia boleh memusnahkan umat dan masyarakat jika dimiliki oleh jiwa yang lemah keimanannya. Jiwa yang mudah termakan dengan dakyah serta agenda pihak yang ingin melihat perpecahan dan kemusnahan umat Islam secara keseluruhannya. Justeru, kita telah diingatkan oleh Allah *subhanahu wata'ala* dalam surah al-Hujurat, ayat 6:

يَا أَيُّهَا الَّذِينَ ءَامَنُوا إِن جَاءَكُمْ فَاسِقٌ بِنَبَأٍ فَتَبَيَّنُوا أَن تُصِيبُوا قَوْمًا بِجَهَالَةٍ فَتُصْبِحُوا عَلَىٰ مَا فَعَلْتُمْ نَادِمِينَ (٦)

Maksudnya: *Wahai orang yang beriman! Jika datang kepada kamu seorang fasik membawa sesuatu berita, maka selidikilah (untuk menentukan) kebenarannya, supaya kamu tidak menimpakan sesuatu kaum dengan perkara yang tidak diingini - dengan sebab kejahilan kamu (mengenainya) - sehingga menjadikan kamu menyesali apa yang kamu telah lakukan.*

Muslimin dan muslimat yang dirahmati Allah,

Akhirnya dalam perjalanan kehidupan kita di dunia yang fana ini, kita akan kembali menghadap Allah *subhanahu wata'ala*. Usia kita,

adalah perjalanan dunia, pencarian ke syurga. Segala amalan kita akan diperhitungkan, dan kemudian akan disempurnakan balasannya oleh Allah *subhanahu wata'ala*. Marilah kita meneruskan segala usaha yang baik, dan memperbaiki segala kekurangan pada diri kita. Semoga Allah *subhanahu wata'ala* membekalkan kita dengan daya tahan keimanan yang dapat membantu kita mengharungi segala ujian di dunia. Semoga Allah *subhanahu wata'ala* juga sentiasa membimbing kita ke arah yang diredai-Nya dan sekaligus tergolong dalam kalangan hamba-Nya yang berjaya di dunia dan di akhirat. Amin.

Sebagai mengakhiri khutbah, marilah kita bersama-sama menghayati firman Allah *subhanahu wata'ala* dalam surah al-A'raf, ayat 96:

أَعُوذُ بِاللَّهِ مِنَ الشَّيْطَانِ الرَّجِيمِ
وَلَوْ أَنَّ أَهْلَ الْقُرَىٰ ءَامَنُوا وَاتَّقَوْا لَفَتَحْنَا عَلَيْهِم بَرَكَاتٍ مِّنَ
السَّمَاءِ وَالْأَرْضِ وَلَٰكِن كَذَّبُوا فَأَخَذْنَاهُم بِمَا كَانُوا يَكْسِبُونَ

Maksudnya: Dan (Tuhan berfirman lagi): Sekiranya penduduk negeri itu, beriman serta bertakwa, tentulah Kami akan membuka kepada mereka (pintu pengurniaan) yang melimpah-limpah berkatnya, dari langit dan bumi. Tetapi mereka mendustakan (Rasul Kami), lalu Kami timpakan mereka dengan azab seksa disebabkan apa yang mereka telah usahakan.

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِمَا فِيهِ مِنَ الْآيَاتِ
وَالذِّكْرِ الْحَكِيمِ، وَتَقَبَّلْ مِنِّي وَمِنْكُمْ تِلَاوَتَهُ، إِنَّهُ هُوَ السَّمِيعُ الْعَلِيمُ. أَقُولُ
قَوْلِي هَذَا، وَأَسْتَغْفِرُ اللَّهَ الْعَظِيمَ لِي وَلَكُمْ، وَلِسَائِرِ الْمُسْلِمِينَ
وَالْمُسْلِمَاتِ، وَالْمُؤْمِنِينَ وَالْمُؤْمِنَاتِ، فَاسْتَغْفِرُوهُ إِنَّهُ هُوَ الْغَفُورُ الرَّحِيمُ.
اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ *

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ *

اللَّهُ أَكْبَرُ كَبِيرًا، وَالْحَمْدُ لِلَّهِ كَثِيرًا وَسُبْحَانَ اللَّهِ بُكْرَةً وَأَصِيلًا. لَا إِلَهَ إِلَّا اللَّهُ وَلَا نَعْبُدُ إِلَّا إِيَّاهُ مُخْلِصِينَ لَهُ الدِّينَ وَلَوْ كَرِهَ الْكَافِرُونَ.

الْحَمْدُ لِلَّهِ الَّذِي جَعَلَ الْأَضَاحِي مِنْ أَجْلِ الْقُرْبَانِ. وَضَاعَفَ لِعَامِلِهَا الْحَسَنَاتِ. وَكَانَتْ سَبَبًا لِدُخُولِ أَهْلِهَا الْجَنَّاتِ. أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ. وَأَشْهَدُ أَنَّ سَيِّدَنَا مُحَمَّدًا عَبْدُهُ وَرَسُولُهُ. اللَّهُمَّ صَلِّ وَسَلِّمْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ الَّذِينَ فَازُوا بِالْجَنَّةِ. أَمَّا بَعْدُ، فَيَا أَيُّهَا الْمُسْلِمُونَ، اتَّقُوا اللَّهَ حَيْثُ مَا كُنْتُمْ فَقَدْ فَازَ الْمُتَّقُونَ.

اللَّهُ أَكْبَرُ، اللَّهُ أَكْبَرُ، اللَّهُ أَكْبَرُ، وَلِلَّهِ الْحَمْدُ.

Muslimin dan muslimat yang dirahmati Allah

Bersempena dengan Hari Raya Korban ini, umat Islam digalakkan untuk melakukan ibadah korban. Tempoh masanya bermula dari terbitnya matahari pada Hari Raya Aidiladha setelah berlalunya tempoh masa yang mencukupi untuk dua rakaat solat dan dua khutbah yang ringan sehingga terbenamnya matahari pada hari tasyriq terakhir, iaitu 13 Zulhijjah. Pada tempoh masa itu, marilah bersama-sama kita melaksanakan ibadah korban ini.

Sesungguhnya, ibadah korban mempunyai ganjaran yang amat besar sebagaimana Imam at-Tirmizi *rahimahullah* meriwayatkan sabda Rasulullah *sallallahu 'alaihi wasallam*:

« مَا عَمِلَ آدَمِيُّ مِنْ عَمَلٍ يَوْمَ النَّحْرِ أَحَبَّ إِلَى اللَّهِ مِنْ إِهْرَاقِ الدَّمِ،
إِنَّهَا لَتَأْتِي يَوْمَ الْقِيَامَةِ بِقُرُونِهَا وَأَشْعَارِهَا وَأَظْلَافِهَا، وَأَنَّ الدَّمَ لَيَقَعُ مِنْ
اللَّهِ بِمَكَانٍ قَبْلَ أَنْ يَقَعَ مِنَ الْأَرْضِ، فَطَيَّبُوا بِهَا نَفْسًا»

Maksudnya : *Tidak ada amalan anak Adam (manusia) pada hari raya haji yang paling disukai Allah selain daripada menyembelih korban. Haiwan ternakan yang dikorbankan itu akan datang kepada mereka yang melakukannya pada hari kiamat seperti keadaan asalnya iaitu, lengkap dengan tanduknya, bulunya, kukunya, darah korban itu lebih dahulu jatuh ke suatu tempat yang disediakan Allah sebelum dia jatuh ke bumi (pahalanya disegerakan Allah). Maka dengan sebab itu hendaklah kamu dengan rela dan ikhlas hati melaksanakannya untuk keuntungan diri sendiri .*

Pada masa yang sama, marilah kita memperbanyakkan istighfar dan memohon keampunan daripada Allah *subhanahu wata'ala*. Semoga Allah *subhanahu wata'ala* mengampuni segala dosa kita dan menerima segala amalan kita. Marilah kita juga berdoa untuk kebaikan umat Islam di seluruh dunia agar mereka sentiasa berada dalam lindungan dan rahmat Allah *subhanahu wata'ala*.

قَالَ اللَّهُ تَعَالَى:

إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ آمَنُوا صَلُّوا عَلَيْهِ وَسَلِّمُوا تَسْلِيمًا

اللَّهُمَّ صَلِّ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا صَلَّيْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، وَبَارِكْ عَلَى سَيِّدِنَا مُحَمَّدٍ وَعَلَى آلِ سَيِّدِنَا مُحَمَّدٍ، كَمَا بَارَكْتَ عَلَى سَيِّدِنَا إِبْرَاهِيمَ وَعَلَى آلِ سَيِّدِنَا إِبْرَاهِيمَ، فِي الْعَالَمِينَ، إِنَّكَ حَمِيدٌ مَجِيدٌ.

وَارْضَ اللَّهُمَّ عَنِ الْخُلَفَاءِ الرَّاشِدِينَ الْمَهْدِيِّينَ، سَادَاتِنَا أَبِي بَكْرٍ وَعُمَرُ وَعُثْمَانُ وَعَلِيٌّ، وَعَنِ الصَّحَابَةِ وَالتَّابِعِينَ لَهُمْ بِإِحْسَانٍ إِلَى يَوْمِ الدِّينِ.

اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ وَالْأَمْوَاتِ. إِنَّكَ سَمِيعٌ قَرِيبٌ مُجِيبُ الدَّعَوَاتِ وَيَا قَاضِيَ الْحَاجَاتِ.

Ya Allah! Bantulah saudara-saudara kami di mana sahaja mereka berada, khususnya di negara Palestin. Kurniakanlah kepada mereka perlindungan, keselamatan dan kemenangan dalam menghadapi ujian dan cabaran dengan pengorbanan. Angkatkanlah daripada mereka bala bencana, peperangan dan permusuhan dengan limpah rahmat-Mu, Tuhan yang Maha Rahmat.

Ya Allah, ampunilah dosa-dosa dan kesalahan kami, ibubapa kami, ahli keluarga dan guru-guru kami. Limpahkanlah kesejahteraan, kedamaian, kebahagiaan serta kekuatan iman menuju kejayaan di dunia dan di akhirat.

Ya Allah, Ya Rahman, Ya Rahim! Berikanlah taufiq dan hidayat-Mu kepada kami semua dan juga kepada pemimpin-pemimpin Negara

kami, khasnya kepada Seri Paduka Baginda Yang di-Pertuan Agong Malaysia, dan juga pemimpin-pemimpin negeri kami, khususnya Tuan Yang Terutama Yang di-Pertua Negeri Sarawak.

Ya Allah, hindarkanlah kami dari gejala rasuah dan pelanggaran kepada peraturan dan undang-undang serta penyalahgunaan dadah. Kurniakanlah keselamatan dan kesejahteraan, jadikanlah kami ummah yang berkualiti dan berintegriti demi mencapai negara yang aman dan makmur serta mendapat perlindungan-Mu, ya Allah.

Ya Allah, Ya Dzal Jalali Wal Ikram! Ya Allah, kukuhkanlah perpaduan dan kesatuan kami dalam aqidah, ibadah dan akhlak di bawah pegangan Ahli Sunnah Wal Jamaah. Limpahkanlah ke atas kami nikmat keselamatan, kesihatan dan keafiatan serta hindarilah kami daripada segala wabak penyakit.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.
رَبَّنَا اغْفِرْ لَنَا وَلِإِخْوَانِنَا الَّذِينَ سَبَقُونَا بِالْإِيمَانِ وَلَا تَجْعَلْ فِي قُلُوبِنَا غِلًّا
لِّلَّذِينَ ءَامَنُوا رَبَّنَا إِنَّكَ رَءُوفٌ رَّحِيمٌ
وَوَفَّقْنَا وَإِيَّاكُمْ لِكُلِّ فِعْلٍ حَمِيدٍ، وَأَعَادَ عَلَيْنَا وَعَلَيْكُمْ مِنْ بَرَكَاتِ هَذَا
الْيَوْمِ السَّعِيدِ، وَأَعَدْنَا وَإِيَّاكُمْ مِنْ هَوْلِ الْيَوْمِ الْوَعِيدِ. وَأَدْخَلْنَا وَإِيَّاكُمْ
الْجَنَّةَ مَعَ الْفَائِزِينَ الَّذِينَ دَعَوَاهُمْ فِيهَا سَلَامٌ وَآخِرُ دَعْوَاهُمْ أَنْ الْحَمْدُ لِلَّهِ
رَبِّ الْعَالَمِينَ، وَلَذِكْرُ اللَّهِ أَكْبَرُ، وَاللَّهُ يَعْلَمُ مَا تَصْنَعُونَ.